



Акафист преподобному Никону Радонежскому и всея России чудотворцу

Кондак 1

Великого строителя Лавры богоноснаго Сергия достойными похвалами ублажим преславно. Ты же, яко добрый любителю благолепия, прими от нас сицевая, с любовью тебе приносимья пения: Радуйся, Никоне, Церкви Российстей украшение.

Икос 1

Ангелу, пустынному подражателю, к Сергию, отцу твоему притекл еси и до конца верен заветам его пребыл еси, темже поминай нас, в веселии зовущих ти:

Радуйся, Никоне, избегший житейских попечений.

Радуйся, добрый послушателю отеческих учений.

Радуйся, корень зла в себе победивый.

Радуйся, лилию благочестия в сердце своем
возрастивый.

Радуйся, Никоне, Церкви Российской
украшение.

Кондак 2

Видя в родителях своих доброе благочестие и
веры православных твердое исповедание, яко
чадо их возлюбленное воспевал еси с ними:
Аллилуиа.

Икос 2

Разум добр стяжав себе, плоды благочестиваго
воспитания вскоре, в младом возрасте явил еси:
кротостью и смирением Богу угождая, сим
добродетелем твоим подражая, сих добродетелей
достигнути желая, велегласно зовем:

Радуйся, добрая отрасли родителей
благочестивых;

Радуйся, в юности еще сад Христу в сердце
своем насадивый.

Радуйся, иноческий путь на земли избравый;

Радуйся, прелести мира сего поправый.

Радуйся, Никоне, Церкви Российской
украшение.

Кондак 3

Силою свыше умудренный, к подвижнику
великому пришел и к стопам его припал, умоляя
его, дабы одним сердцем пети с ним песнь
Христу Господу: Аллилуиа.

Икос 3

Имея от Бога дар прозрения, Сергей
Преподобный, отец твой духовный, узрев в тебе
искреннее излияние души твоея, повеле [ко]
ученику своему Афанасию в обитель его
шествовати и в ней иноческому житию
поучатися. Мы же на сем пути твоём зовем:

Радуйся, сердце свое преподобному отцу
открывый;

Радуйся, душу свою в послушание ему
преклонивый.

Радуйся, ревностным иноком себе явивый;

Радуйся, радость небесную получивый.

Радуйся, Никоне, Церкви Российской
украшение.

Кондак 4

Бурю житейских помышлений презревши, сан иерея Божия восприял еси, в новом подвиге своем всерадостно воспевая средцем и усты: Аллилуиа.

Икос 4

Слыша о твоём добром житии, по двоих летех преподобный отец твой Сергей возжела видети тя и с радостию прияв, в единой келии с собою житии повеле, благодатию сердце твое к совершенству уготовляя, мы же вас вкупе яко единых прославляем:

Радуйтесь, добрии добродетелей подвижницы;

Радуйтесь, души свои в храм божий устроителие.

Радуйтесь, Христовых совершенств достизателие;

Радуйтесь, ангельского жития подражателие.

Радуйтесь, отцы наши Сергие и Никоне, Церкви Российстей славо и украшение.

Кондак 5

Боготочною рукою духовная дарования источая,
вся на полезная наставляя, Сергие и Никоне
преподобне, песнь Богу воспевающе: Аллилуиа.

Икос 5

Видевше добраго себе помощника в попечении о
братии, учитель твой Сергей преподобный избра
тя и постави игуменом обители своея, ты же
Никоне всеславный, безмолвие возлюбивый,
токмо воле отца повинувшися приял еси бремя
трудов его, того ради зовем:

Радуйтесь, искреннии наши наставницы;

Радуйтесь, славнии домов Божиих строителие.

Радуйтесь, сокровищ духовных обладателие;

Радуйтесь, монашествующих собирателие.

Радуйтесь, отцы наши Сергие и Никоне, Церкви
Российстей славо и украшение.

Кондак 6

Проповедник божественных учений был еси,
Никоне преподобне, в церкви братию поучая,
пети всегда: Аллилуиа.

Икос 6

Возсия миру светом евангельского благочестия,
к миру ангельскому преставися учитель твой,
Никоне преподобне, ты же скорбию
исполненный, прими яко общника печали твоея,
песнопения сия:

Радуйтесь, преподобнии Сергие и Никоне,
истиннии друзи Христовы;

Радуйтесь, вернии исполнителие заповедей его.

Радуйтесь, добрии делателие вертограда его;

Радуйтесь, блаженнии наследницы, горния
славы его.

Радуйтесь, отцы наши Сергие и Никоне, Церкви
Российстей славо и украшение.

Кондак 7

Хотя добре исполнити служение свое, любовь
отеческую к братии изливал еси, темже и имя
твое, яко миро всюду, благоуханием своим
подвизая всех пети: Аллилуиа.

Икос 7

Дивно являя в житии своем многие труды твоя,
еще и словом поучения монашествующих

наставляя како жити им по воле Творца своего; за сию ревность делания твоего прими похвалу сию:

Радуйся, добрый пастырю овец своих;

Радуйся, игумене, достойный преподобнаго Сергия преемниче.

Радуйся, твердый исполнителю его велений;

Радуйся, любимый посреде монашествующих селений.

Радуйся, Никоне, Церкви Российстей украшение.

Кондак 8

Странно безмолвия любителю обителью иноков управляти и игуменом братии бытии и по шести летех на подвиг совершеннаго уединения, преподобне отче, устремися, да единою душою неразлучно Богу предстоя вопити Ему: Аллилуиа.

Икос 8

Весь горе возвысися и созерцая сердцем неизреченная и преславная, не можаше отринуть моление братии: «Попекись и о спасении ближних твоих», с любовью приял

паки бремя трудов в обители: сих ради и мы
паки зовем ти:

Радуйся, скорый послушателю верных молений;

Радуйся, теплый ходатаю наших прошений.

Радуйся горе предстоящий;

Радуйся, доле усердием горящий.

Радуйся, Никоне, Церкви Российской
украшение.

Кондак 9

Вся братия обители Святыя Троицы печали
исполнишася, егда хан Едигей опустоши землю
Российскую и к обители их приступи, токмо
молитвами Никона игумена своего не остави
пети песнь: Аллилуиа.

Икос 9

Ветии многовещании недоумевают, что и
глаголати о пречудном видении преподобнаго,
егда святителие Московские Петр и Алексей, а с
ними и преподобный Сергей явишася и рекоша
ему: «Угодно сие Господу, да коснутся сего места
иноплеменницы, да не скорбите и не смущайте
сердца ваших; искушение скоро преjde и
обитель не токмо не запустеет, но более

расцветет». За сие откровение тебе достойне воспевати похвалы сия:

Радуйся, Никоне, молитвенниче теплый и преизрядный;

Радуйся, откровений Божиих зрителю.

Радуйся, будущих яко настоящая созерцателю.

Радуйся, Никоне, Церкви Российской украшение.

Кондак 10

Спасти хотя святыни неким удалихся временно с братию своею из обители и в изгнании не преста с надеждею воспевати Богу: Аллилуиа.

Икос 10

Царю Превечный, Утешителю, Троице Пребожественная, не даде погибнути месту избранному и по удалении Едигея с полчищами, превратившаго всю обитель в развалины, возвратишася преподобный с братиею и нача восставляти обитель своего чуднаго наставника, за сию ревность пламенную и за великое множество трудов твоих, прими всеблаженне Никоне, песнь сию к тебе возносимую:

Радуйся, возлюбленное чадо Святыя Троицы;

Радуйся, избранный сосуде Божественного
промышления.

Радуйся, многи скорби претерпевый;

Радуйся, от них же Господом избавивыйся.

Радуйся, Никоне, Церкви Российстей
украшение.

Кондак 11

Пение всеумиленное приносим тебе, преподобне,
яко по триех летех через тя исполнишася
пророческое проречение отца твоего духовного и
обитель яко крин процвете на месте
опустошения и все множества иноков воспеша
благодарственную песнь Господу: Аллилуиа.

Икос 11

Светоподателя узрев в тебе Церковь Российская,
яко сподобишася обрести и на свещнице мира
отца твоего Сергия богоноснаго, мощи святыя
поставити и над сими храм Живначальныя
Троицы воздвигнути и живописью лучшею
украсити его, за сия труды твоя прими от
недостойных уст славословия:

Радуйся, сподобивыйся узрети и миру всему
явити святого тела Сергиева нетление;

Радуйся, чрез сие громогласно проповедавый таинство Воскресения.

Радуйся, Пасху вечную миру явивый;

Радуйся, строителю церкви Божией и украсителю.

Радуйся, Никоне, Церкви Российстей украшение.

Кондак 12

Благодать подаждь ми, Господи, да воспою достойно угодника твоего, научающа всех пети: Аллилуиа.

Икос 12

Поюще житие твое, отче преподобне, восхваляем и скончание твое, како поучая братию: «Держати веру правую и житие благочестивое» умолк и в радости воскликнув: «Отнесите меня в храмину светлую, уготованную мне молитвами отца моего», и, оградив себя крестным знамением, душу свою Богу предал еси, темже мы вечно тебе благодарнии, благоговейно поем:

Радуйся, светильниче веры и благочестия;

Радуйся, луче Света Невечерняго.

Радуйся, наследниче жизни вечныя;
Радуйся, радости наша и похваление.

Радуйся, Никоне, Церкви Российстей
украшение.

Кондак 13

О, великий угодниче Божий, друже Сергиев и
сожителю всем святым, не престай посещати
нас, любовью поминающих тя, подавая
требующим исцеление и миру всему утешение,
да с радостью всегда вопием: Аллилуиа,
аллилуиа, аллилуиа.

Этот кондак читается трижды, затем 1-й икос и
1-й кондак.

